




CD





LE
REMERCIEMENT
DES CATHOLIQUES
VNIS,

*Faiçt à la Declaration & Protestation
de Henry de Bourbon,
dict Roy de Navarre.*



A LYON,
Prins sur la coppie imprimée à Paris.

1589.

AVEC PERMISSION.

REMERCIEMENT

DES CATHOLIQUES

1812

Par J. B. Lefebvre

Paris chez la Citoyenne Lesclapart

Case

F

39

.326

THE NEWBERRY
LIBRARY

1589 remt



LE MERCIEMENT
des Catholiques unis, faict à la
Declaration & Protestation
de Henry de Bourbon,
dict Roy de Na-
uarre.



V R la Declaration, SIRE,
 que vous auez faicte le iiij. iour
 de Mars dernier passé, en qua-
 lité de premier Prince, & pre-
 mier Magistrat de France: l'ay
 pris la hardiesse de vous faire ce remerciement,
 sur la resolution que moy (le moindre de ce
 Royaume) ay peu entendre des Catholiques
 unis, par vne sainte & sacree deuotion à la con-
 seruation de la Religion Catholique, Aposto-
 lique & Romaine. Vous vous estes bien tard
 aduisé d'escrire aux Estats de France, qui sont
 rompus d' le xxij. iour de Decembre prece-
 dant, & après les massacres y commis, empri-

sonnemens & autres forfaits contre leur auctorité & contre la foy publique: Vous leur demandez qu'ils ayent à requerrir la diuersité de religion, & toutesfois tous leurs cahiers ne tendoient qu'à ce qu'il n'y eust qu'une Foy, qu'une Loy, & qu'un Roy: & que vous comme chef des heretiques, fussiez déclaré ennemy & incapable de ceste Couronne. Nous vous remercions doncques bien grandement, de ce que vous offrez & si protestez d'employer vostre industrie, vostre conscience, voz moyens, & voz forces pour remedier au troubles de la France, & nous mettre en paix par un meslange & embarrasement de diuerses religions. Nous vous remercions, di-ie, c'est à dire, nous ne voulons point de vostre remede, & vous prions de ne vous point mesler de noz affaires: Nous cerchons bien la paix, & serions bien mal aduisez, si nous fuyons ce seul & unique moyen, de nous contenir en l'honneur de Dieu, & en la conseruation de la societé humaine. Mais nous ne voulons pas nous aider de voz moyens. Nous cerchons la paix avec Dieu, en l'honorant en nostre ancienne & asseuree religion, & nous conseruant noz villes, noz maisons, & famille, en vne seule opinion & conforme façon de viure, non entremeslee des disputes

tes de voz Predicans , ny bigarree de diuerſes ſolemnitez , que vous voulez introduire par vne liberté de cōſcience. Nous entendons que en vne meſme langue , par la vertu d'vn meſme ſacrifice , ſoubs la ſaincteté de meſme Sacremens, & par l'interceſſiō de meſmes prieres, nous puiſſions tous d'vne voix inuoyer la grace de Dieu, & en vne ſeule Foy, & vne ſeule Loy, nous aſſeurer les vns des autres. Et pour ce nous auons fort à ſuſpect la paix que vous nous prezentez : Car en diuerſité de religion, il y a peu de reſpect aux promeſſes des vns enuers les autres: & comme vous diſtes, *où Dieu eſt diuerſement ſeruy, il eſt par conſequent mal ſeruy*, qui eſt vne choſe vraye. Car gens de deux religions ne ſe tiennent pas obligez de Foy l'vn à l'autre, n'y ayant entr'eux de promeſſe durable. Teſmoin le ſerment de voſtre mariage, & des Edicts de pacification, que vous n'avez obſeruez, ſinon entant que vous avez penſé, qu'ils vous donneroient moyen de reſpirer pour nous ſurprendre plus à voſtre aïſe. Et ce nous euſt eſté vn grand bien, qu'en la ville de Blois, aux Eſtats generaux que l'on y tenoit, pour ſe deſpaïſtrer de voz pernicieuſes paix, nous euſſions eſté bien aduertis que chacun n'auoit pas vne pareille reuerence au S. Sacrement de noſtre re-

ligion que nous auons : & que nous n'eussions pas ignoré, ce dont vous nous assurez à present par vostre Declaration, *que vostre innocence est imprimée dans l'ame & conscience de celuy que vous appelez vostre Roy, & vostre souverain.* Car nous ne nous fussions pas ainsi laissé surprendre, & nous est vn grand malheur que de nous estre appuiez sur le serment d'un qui n'a vſé de noz Sacremens que pour se periurer. Vous adioustez en vn autre endroict ces mots, *Dieu à touché le cœur du Roy, il a pris la querelle pour moy.* Et neantmoins sous pretexte de vous faire la guerre, il a leué vn nombre infiny de deniers sur son peuple, & enuoyé Monsieur de Ioyeuse avec quatre ou cinq cens Gentils-hommes, contre vous à vostre compte, comme à la boucherie. Et puis qu'ainsi est que c'est pour l'amour de vous & pour vostre querelle, c'est à dire pour la religion Huguenotte, deportez vous s'il vous plaist, & ne nous importunez plus de vos offres. Ce n'est pas icy la premiere fois que vous vous estes présenté pour Medecin de nostre maladie, & que vous en auez esté, comme à present, éconduit, il faut laisser au malade de choisir son Medecin, & n'admettre pas ceux qui au peril de la vie du patient, se veulent mettre en credit. Et mesme sont à craindre vn tas
d'Empe

d'Emperiques, qui ne se veulent aider que de remedes nouueaux, & non encor experimenter. Toutes nouueautez nous sont fort suspectes, & trouuõs meilleur de suiure l'aduis commun & approuué de toute ancienneté. La pauvre ville de Chastelleraud, ou vous auez composé vostre recipé, est en danger d'en s'ouffrir beaucoup, comme les autres villes que vous tenez par force, & les ingrediãs dõt vous aidez sont de tres-fascheuse & perilleuse purgation: Car il n'y a reliques ne gallices ny autres ornemens de l'Eglise qui n'en soyent euacuez. Et de faict par vostre declaration, vous protestez en ces mots, parlant au Clergé: *Au lieu ou i'ay puissance, ie leur tiendray quasi tout:* qui est pour mōstrer le bien qu'il peut esperer de voz remedes. Et certainement vous auez grace, quand dès le commencement de ceste Declaration, vous cōfessez que vous estes *l'argument des tragedies de France*, c'est à dire le subiet, le principe, & le motif de tous les malheurs que nous auons en ce miserable Royaume: & combien que vous puissiez pardonner à vous mesme, ce neantmoins vous dictes, que vous en estes l'occasion. Qui sont les propres mots de vostre Declaration laquelle nous faict esbahir, que vous vantez de pouoir apporter le remede conuenable à nostre douleur:

douleur ? de façon que vous tendez de guerir
 le mal de nostre vlcere, par la cause meisme de
 la bleffure. Qui est vn mauuais methode & qui
 est fort reietté entre les plus experts Medecins,
 si ce n'est par le moyen que vous cotez en di-
 sant, *que vous voudriez auoir estaint le feu de no-*
stre fieur. & n'estre plus. Nous vous prendriõs
 volontiers au mot, & croyons que ce seroit vn
 grand preparatif de nostre guarison: mais vous
 nous en ostez bien tost l'esperance, quand vous
protestez de maintenir toutes sortes de Religion,
& y employer toutes voz forces au peril de dix mil
vies. Car celà ne s'accorde pas, à ce que vous
 confessez, *qu'ou Dieu est diuersement seruy, il est*
par consequent mal seruy. Il est vnique & ayme
 l'vnité de ses creatures: loinct aussi qu'autre-
 fois en la ville de Montauban, incontinent
 apres la mort de Mõseigneur le Duc d'Anjou,
 conferant avec le sieur Roquelaure, & vostre
 ministre Marmet, de ce que vous auiez à faire,
 vous pristres resolution, par l'aduís & conclu-
 sion du feu President du Ferrier vostre Chan-
 celier, que iamais vous ne changeriez de reli-
 gion, & maintiendriez iusques au dernier sou-
 spir de vostre vie, la doctrine en laquelle vous
 auez esté institué & nourry, par les ministres
 de la secte de Calvin. Et sur ceste deliberation,
 vous

vous faites vne assemblee de tous voz confedererez, où se trouuerent deputez d'Angleterre, de d'Annemark, de Geneue, de Sedan. Et sur tout ce qui fut remarqué, le sieur d'Espernon s'y trouua, & promistes de ne iamais dissimuler vostre religion. Et ainsi nous sçauons bien que vous perseuererez, ne voulant pas estre accusé de legereté, enuers tant de Princes & Seigneurs. Car c'est vn vice dont vous ne voulez pas estre mescreu. Et de faict quelque protestation que vous faciez maintenant, de maintenir les deux religiōs, si est-il certain, que vous auez promis à voz ministres de les conseruer, qui est à dire ruiner les Catholiques. Car les Huguenots s'aident de deux moyens comme nous faisons, à sçauoir de Predications & de la force. Et puis que les Predicans Huguenots nous reprochent estre heretiques, & qu'ils ont presché, & faict des liures, pour monstrier que les heretiques doiuent estre bruslez, il s'ensuit que par la force vous entendrez maintenir ceste proposition, & par voz armes effectuer ce que voz Predicans veulent persuader par leurs raisons. Et que la liberté de conscience que vous promettez à present, n'est qu'en attendant que vous puissiez establir l'autorité que vous pretendez auoir en ce Royaume. Vous ingerant desia d'y

vsér de commandemens & de menaces à ceùx
 qui ne voudront vous obeir. Et de faict, vous
 protestez que ce n'est sinon pour ceste heure,
 que vous entendrez maintenir diuersité de reli-
 gion: c'est à dire iusques à ce que vous foyez le
 plus fort, voulant gagner le Clergé par ces
 paroles: *Quant à leur profession & leur religion,*
en quelque chose ie leur suis contraire, en nulle leur
ennemy: en d'autres nous sommes d'accord, ne fuf-
se qu'en ce qui touche la conseruation des priuileges
del'Eglise de France & libertez: c'est à dire quād
 il est question de desnier l'autorité de nostre
 Sainct pere le Pape, & renuerfer toutes les con-
 stitutions de l'Eglise vniuerselle. Car les Po-
 litiques de nostre temps l'interpretent; &
 bestendent aussi auant qu'il plaist aux Hu-
 guenots, puis apres vous adioustez: *Quoy*
que soit si i'auois avec eux toutes les prises du mon-
de, ie les mettrois sous le pied pour ceste heure,
emporté par une plus forte consideration qui est le
service de mon Roy, & du bien de cest estat: qui est
 pour monstren qu'en attendant vostre meilleu-
 re commodité, vous preferez l'esperance que
 vous auez au Royaume, à ce que vous estimez
 estre agreable à Dieu. Et voilà comme nous
 ne sommes pas ignorans quel est l'intellect de
 vostre protestation, disant: *Je proteste que tout*
ainsi

ainsi que ie n'ay peu souffrir que l'on m'ait cōtraint en ma conscience, aussi ne souffriray-ie, ny ne permettray iamais, que les Catholiques soyent cōtraincts en la leur, ny en leur exercice libre de religion : ce sont parolles pour vous insinuer en quelque bōne opinion. Et en lisant cela il nous est souuenu des priuileges & dispēces octroyez par voz ministres aux Huguenots leur permettant de passer au trauers nos Eglises, pour y prendre leur plus court chemin, ou bien de s'y tenir à la suite de quelqu'vn à qui ils eussent à faire. Car c'est ainsi que vous pretendez vous faciliter & abreger le chemin du Royaume de France, & pour vostre commodité. Comme petit à petit l'on fit en Angleterre, & vous l'avez obtenu en Biart, où il n'y a pour ceste heure Catholique, qui ose paroistre, & ne sont pas en seureté, mesme dans les plus tenebreuses caues de leurs maisons : & par tout ou vous commandez absolument, vous tenez le peuple en telle frayeur, que vous leur faictes demander & consentir ce qu'il vous plaist. De sorte que pour n'encourir les peines de voz menaces, il est facile de faire demander aux Estats, ce que bon vous semble. Et c'est ainsi que vous voulez que lon tienne vn Concile national libre, c'est à dire, ou vous soyez le plus fort, & en la

congrégation duquel , vous parueniez à mes-
 me effect , qu'en l'assemble des Estats tenus à
 Blois, que vous approuuez: *Et protestez de faire*
reconoistre l'autorité du Roy, quand par la man-
 fuetude de son naturel, en fauçant sa foy , il a
 proditoirement faiët assassiner les Princes Ca-
 tholiques , emprisonner les autres, rompre les
 Estats, & effaroucher de telle façon tous les de-
 putez des prouinces de ce Royaume , que le
 plus hardy d'entr'eux n'a plus garde de deman-
 der l'assemblee des Estats , soubz son authori-
 té, ny soubz la vostre. Et s'il n'y est autrement
 pourueu par les moyens que Dieu nous fera la
 grace d'auoir, nous laisserions desormais plu-
 tost tout deperir, que de demander reforma-
 tion, qui nous mette à telle difformation. Ce
 sont les effects de voz ministres beau Sire, quād
 par leur nouuelle doctrine, ils ont persuadé, que
 les Sacremēs de nostre Eglise ne sont pas obli-
 gatoires: vous auez raison de reconnoistre les
 Princes de Lorraine, pour voz proches parens,
 gens de valeur & de seruices. Car quand vous
 feites contenance par l'espace de trois ou qua-
 tre ans d'estre Catholique, il vous ont aimé,
 chery, & honoré, autant que iamais vous euf-
 siez sceu souhaitter, & ne vous ont laissé que
 lors que vous auez abandonné l'Eglise de Dieu.

Et si

Et si le Roy eust voulu se seruir d'eux, il eust esté le plus grand & le plus heureux Prince de la Chrestienté. Mais le malheur en a dict autrement à la France, par le ministere de ceste Huguenotte heresie, ou plustost de l'atheisme, en introduction & meslange que l'on veut faire de diuerses religions. Si vous estiez en ceste qualité receu nostre Roy, lon pourroit faire comparaison de celuy qui espousant vne iuste & loyalle femme, reserue toutesfois de coucher avec sa concubine. Et neantmoins vous nous dictes *que nous prenions le chemin de vous instruire, & que nous y profiterons beaucoup.* A vous ouir parler, vous n'etes plus heretique, mais parauenture auez passez outre. Car il n'y a heretiques, que ceux qui ont quelque religion obstinee, & si desia vous nous promettez que nous profiterons à vous instruire, vous auez donc esperance de paroistre Catholique, & parauanture nous ne le prometterez vous ainsi, sur vne foy semblable, que celle qui nous fut iuree à Blois pour vostre querelle. Et sur laquelle il y a toutesfois occasion de craindre, que nous n'eussions aussi mauuaise issue de vostre pretendue innocence, que nous auons eu de la bonté & clemence de celuy que vous appelez vostre Roy, & souuerain. Il est bien vray

que vous pensez auoir trouué ouuerturé d'accord entre nous, *en nous rengeant à ce que decernerá vn Concile libre*: c'est à dire, ou vous foyez en seureté, & non pas nous, tout de mesme que pour voz pretentions contre Monseigneur le Cardinal vostre oncle. Car pendant qu'à la honte de ses nepueux, il est prisonnier, vous estimerez estre en liberté de cōferāce avec luy, pour vuidier la questiō sur laquelle sont esmeuz les troubles de France. Et combien que vous disiez qu'ils sont fondez *sur la vaine & imaginaire crainte de vostre succession à cest estat*. Si est-ce que vous nous donnez bien à entendre quelles sont voz pretentions, quand desia par ceste Declaration vous nous commandez de poser les armes, avec menaces de nous punir, si nous y contreuenons. Et les lettres de proximité que vous avez obtenuës, & autres voz actes, font bien paroistre quelle est vostre intention, pendant l'euenement de laquelle, vous demandez vn Concile. Mais quelle apparence y auroit il de demander vn Concile nouueau, veu que les precedans, & principalement celuy de Trente, qui est exprez, ont desia cōdāné vostre heresie. Et est certain que sur vne mesme heresie, lon ne tient iamais deux Conciles, & suffit qu'elle ait esté vne fois condamnée. Ioint
aussi

aussi que ce n'est à nous qu'il se faut adresser,
 pour demander vn Concile general. Que si
 vous entendez vn Concile national, ja Dieu
 ne plaise que pour vne dispute qui appartient à
 toute l'Eglise, lon nous accuse d'en vouloir
 seuls determiner en nostre país. Les Conciles
 nationaux, ne sont que pour ce qui est propre
 & particulier à la nation: mais nostre Religion
 est commune à toute l'Eglise vniuerselle, hors
 de laquelle nous ne deuons, ny ne pouuons
 rien deliberer. Car ce seroit nous mettre au
 hazard de nous separer de l'Eglise Catholique,
 Apostolique & Romaine, hors de laquelle
 nous croyons fermement, qu'il n'y a point de
 salut; & sçauons bien que toutes les oppositiōs
 que lon a formé contre la publication du Con-
 cile de Trente; ne sont qu'en vostre faueur. Car
 hors mis la condamnation particuliere qui est
 de l'heresie de Caluin, il n'y a rien qu'une repe-
 titiō de l'ancienne ordonnance & discipline
 de l'Eglise: & ceux qui disent que le Pape y est
 mis par dessus le Concile, & qu'il y a des con-
 stitutions contraires à l'ancienne liberté de la
 France, s'abusent, & s'ils auoient pris la peine
 de le lire, ils cognoistroient le contraire. Je dis
 expres de l'ancienne liberté de la France, & non
 pas des nouuelles licences, & debordemens
 que

que les heretiques y ont scandaleusement introduit : de sorte que vostre demande n'est iuste ne raisonnable , quand vous tendez à vn Concile national, contraire aux Conciles generaux. Ce que nous croyons , nous ne le voulons plus reuoquer en doubte : comme aussi par tant de colloques , & disputes , nous auons apperceu que les authoritez & raisons n'ont de rien seruy, & n'est pas possible d'apporter aucune chose de nouueau, qui n'ait desia esté ditte, & escrete , & ne nous estant point venu de nouueaux textes d'Euangile , il ne sortiroit rien de noz docteurs , que vous n'ayez assez ouy , & si ne voulons point de voz raisons , qui n'ont esté que par trop entendues. C'est à faire à gens qui doutent de leur croyance , de demander estre instruits, comme aussi seroit-il difficile, de definir vn Concile libre , & du tout impossible de l'executer encor. Le vous demanderois volontiers , qui c'est que vous entendez faire Iuges de nos differens. Ce seroyent parauanture des Politiques , qui n'ayans point de party, nous accorderoyent facilement , en mettant au neant l'vne & l'autre religion. C'est ce disent-ils , entendre les affaires d'Estat , que de se lacher la bride de ceste façon , & vaguer à volonté en ses discours, sans s'abstraire aux regles.

gles de l'Eglise, mais faire comme chacun l'entend, par vn droict de bien-seance. Nous entendons les effects, par les ingenieuses subtilitez des Partisans, & libertins, qui sans loy, & sans religion, ont accommodé le public à leur particulier. Ce sont d'estranges reformateurs, que ces Messieurs là. Et eust grace vn iour le Lieutenant S. Maixen par vn Apophtegme qui merite d'estre mis en memoire. Car ayant esté decernees commissiōs aux Conseillers d'Estat, pour aller par tout le Royaume, sçauoir les plaintes du peuple, c'est à dire decouurir quel il y faisoit, & trouuer moyen de nouueaux subsides. Cōme vn certain Prelat eust deux & trois fois sommé le corps de ville, de luy declarer ce qu'ils auoyent à dire, pour en dresser son procez verbal, il ne peust rien tirer de l'assemblée, ny bon ny mauuais, & la raison luy en fut expliquée par ce Lieutenant, qui dist que les habitans se gardoient de mesprēdre, & qu'ils craignoient qu'en recitans leurs douleurs, ils fussent surpris du costé où ils auroient oublié de se plaindre, aimās mieux ne rien dire, qu'en comptant leurs miseres, dōner ouuerture de les augmenter, par mauuaises drogues. Ainsi l'assemblée des Estats nous a esté pernicieuse, ne nous yant apporté changement, que de mal en pis :

aussi vostre nouveau Concile nous attraperoit
 à quelque sinistre euenement, & vaut mieux
 fuiure noz premieres brisees, & nous efforcer
 avec la grace de Dieu, de nous deffaire de ceux
 qui causent tous noz maux: voire mais vous
 dictes qu'aussi bien n'y gagnerons nous rien,
 & que l'heresie se doit combattre *par disputes,*
& non par armes. Enquoy il me souuient d'un
 ieune Aduocat, lequel voulant s'aduancer au
 barreau de la plaidoirie, soustenoit qu'il ne fal-
 loit pas punir les coupebources, & qu'aussi
 bien quelques punitions que lon en ait faict, le
 nombre n'en amoindrissioit pas, & qu'il falloit
 plustost les admōnester. Ce qui auoit plus d'ap-
 arence que vostre proposition: car les coupe-
 bources se trouuent volontiers aux meilleures
 predications, où il y a plus de presse, & non pas
 les huguenots qui ne veulent entendre ce que
 lon leur dict. Et sur ce que vous dictes, *que lon*
vous à sommé de changer de religion la dague en
la main, vous faietes tort en la reputation de
 Monsieur le Cardinal de Lenoncourt, lequel
 vous a esté trouuer plusieurs fois, avec plus de
 submissions, & nouuelles sortes de persuation,
 que beaucoup de gens de bien n'eussent desiré.
 Et les bonnes gens de docteurs de Sorbonne,
 que lon vous enuoya pour vous prescher à l'an-
 cienne

ciennē mode , n'auoient point d'armes , & toutefois vous n'en taintes compte. Aussi estiez vous bien aduertý de la bōne volonté que vous confessez à present que le Roy vous porte. Ce qu'il ne peust dissimuler en vne petite forme d'Estats , qu'il tint à S. Germain en Laye, sur la fin de l'annee mil cinq cens quatre vingts & quatre. Car Monseigneur le Cardinal de Bourbon luy ayant proposé que les plus importantes affaires du Royaume, estoient d'exterminer les heretiques , & n'auoir qu'vne religion , il s'esmeut de telle façon qu'il en perdit cōtenance , & se courrouça si aigrement , qu'à peine le pouuoit-on appaiser , & par là fut facile de cognoistre que la diuersité de religion luy plaisoit. Et voilà la paix en laquelle vous voulez nous entretenir , pour quelque temps, comme vous dictes , à fin de mieux paruenir à voz desseins : & bref nous voyons bien que par la mort & emprisonnement des chefs Catholiques , vous pensez auoir ville gaignee , & voulez dire en somme , que vous ne ferez pas des nostres , & que si nous voulons auoir la paix avec vous , il faut que nous soyons tous huguenots. Mais croyez , Sire , que nous n'en ferons rien , & que nous n'auons pas noz biens, noz maisons , noz vies, celles de noz femmes,

& de noz enfans, si chers, que nous ne les voulions proposer à la grace de Dieu, & à nostre salut, que nous croyons fermement n'estre hors l'Eglise Catholique Apostolique & Romaine. Nous auõs a pris par les Histoires, que le Royaume de France, à Saintement asis la premiere pierre de son fondement, sur l'apuy de ceste religion, que par le moyen d'icelle, il s'est acquis de grandes victoires, s'est conserué contre ses ennemis, & a gagné l'honneur & la reputation par dessus toutes nations. Nous auons sçeu que ceste religion est l'assurance du peuple enuers les Roys: nous ne la voulons pas perdre. Et quicõque ne voudra tenir la loy du Royaume, ne sera point nostre Roy. Car comme le peuple ne faißt pas luy seul le Royaume, aussi le Roy n'est rien sans le peuple, & par vne reciproque & mutuelle concordance, le Royaume se maintient: Et quiconque le premier ne veut tenir ce qui est de son deuoir, & enfraint la loy du Royaume, faulse sa foy, & rend l'autre party quitte de la sienne. C'est la difference que tousiours on a faißt d'un Roy à un Tyran, que l'un commande par les loix, & l'autre selon son plaisir, & licentieuse souueraineté. Nous ne sommes point subiects à la Tyrānie. Mais nous voulons obeir à un Roy selon l'ordonnance du

Royau

Royaume : nous desirons estre vn̄is en l'obeissance de noz loix, & que par l'obseruance d'une mesme religion, nous soyons par les Sacrem̄s d'icelle asseurez de la foy des vns enuers les autres. Nous ne voulōs tenir pour compatriotes, ceux qui nous appellēt idolatres. Nous ne voulons point que vous auctorisiez les mariages que l'Eglise a declaré incestueux, & que vous faciez que ceux là soiēt noz heritiers, que nous ne voulons pas aduoüer à parens. Nous ne voulons partager avec ceux, qui se sont vouëz dans les monasteres, & lesquels nous ne reconnoissons pour noz coheritiers : & ne dites pas que cela soit pour faire vn estat populaire, n'y pour émouuoir les villes contre la noblesse. Car les Gentils-hommes y ont autant, voire plus d'interest, que le reste du peuple. Quand nous nous mettons en leur protection, quand nous frayons aux armes, desquelles nous leur laissons la conduite, quand nous leur deferons les hōneurs & prerogatiues qui leur sont deuës, quand nous les exhortons de valleurusement combattre, & leur commettons les gouuernemens de noz villes, ce n'est pas pour esleuer le peuple contr'eux. Et vous qui voulez faire tout le contraire, ne trouués pas estrange, si vous n'estes pas creu, deportez vous, s'il vous plaist,

de nous présenter vostre paix, qui depuis vingt-
 cinq ans & d'auantage, nous a continuellemēt
 diuisez & entretenu en querelles & guerres:
 Aussi bien esperons nous que Dieu nous fera
 la grace de nous maintenir contre voz mena-
 ces, & voz forces, & contre vostre protestation,
 nous protestons au contraire, d'employer noz
 moyens, & noz vies, pour nous garentir &
conseruer. I'ay dit.

F I N.



